

# Hall die Gail unn onnern Ritter

Om Somsdaach bin ich beim Flerschemer Nannklub uff em Senatsowend gewese. Doo brauchdsde koon Oidritt ze bezahle unn kriegst aach noch en Orde umgehängt, wenn de en Umschlaach in de Kasse werfst. Nor dete die sich freue, wenn in dem Umschlaach aach ebbes drin wär. Dann setzde dich unn guckst dich erstemol nooch alle Seite um, weil de so vill Flerschemer erst widder bei de nechst groß Beerdigung siehst. Doo nickt mer noch eriwwer unn eniwwer unn stellt geecheseidich fest, dass sich bei de meiste die Gesichtshaut verännert hott. Mir wernn halt all älter, nor die Zähn wernn bei monchem jünger.

Dann guckste uff die Bien und siehst dort e Flerschemer Heileit, de Bohnhofsplatz. Des hättstde vor e paar Johr aach nit geglaabt, dass der emol so sexy werd unn zum Bienehinnergrund daucht. Dess liecht awwer doo droo, dass dort de Hall-die-Gail vom Reinelt unn e Kloohäusje steht. Sesomme mit em Bohnsteich wernn dort die wichtigste öffentliche Gelüste von de Mensche befriedicht, die nooch Schönheit. Fortfahrn unn Ruh. Doo draus könnt die Stadt ferr des neie Stadtzentrum was lerne unn dort gleich zwaa stille Ortcher oiplone. Wenn dann noch die Archidekte mett sooner Skulptur vom brave, stille, geduldiche Flerschemer ferr die Schönheit sorche unn die Lust zum Abhaue vom Krach von de Fluchzeuche kimmt, dann wär des Stadtzentrum gelunge unn käm später aach emol uff die Bien.

Bevor des Programm losgeht, hosde schunn en Haufe Arweit, weil de schunkele unn dauernd Hall die Gail rufe musst. Später will dann noch die Fraa gedonzt wern, koo Wunner, dass die richdiche Nann iwwer die Fassenacht e paar Killo abnemme.

Die Musick unn dess Programm warn werklich schee. Om beste hott mer gefalle, wie se de Willi Lauck zum Ritter geschlaache hawwe. Als de Dieter Wolf mett em Schwert erumm gefuchelt hott, doo guckt de Willi gonz komisch, der hott richtich Ängst gehabt: ich glaab, weil der gemoont hott, zum Ritter geheert en Gaul unn den kriecht er aach noch geschenkt unn müsst dann beim Fassenachtszug vorneweg reide.

Später hossde genuch Zeit, derr nochemol die Leit oozegucke, doo siehstde vill Prominente wie Parre, Beiemoster, aach der vom Gänskippel war doo, unn onnern Polidische. Om Sunndaach habb ich dann de Karl gefroocht, warum dess so iss, dass bei de Nann immer so vill Polidiker sinn, in Flerschem unn aach beim Fernsehe. Doo hott de Karl gemoont: Gleich unn Gleich gesellt sich gern. Als ich grad Luft holle wollt: Awwer Karl!, doo sacht der: Frieher warns noch die Kinner. Awwer heit sinn die Nann unn die Politiker die oonsiche, die immer die Wahrheit saache.

Eiern Honnes